



*Sabtu, 11 Juni 2022*

**Ogen: Esekiel 39:21-29**



**IBUANG JANAH IBABA MULIH**



Pemulihan, enda siarapken nterem jelma. Kalak si sakit, malem pinakitna. Kalak si rubati, la siangkan, iarapkenna pulih hubungenna. Kalak si ngadi erdahin, iarapkenna pulih ia i bas dahinna. Arapen enda jadi sada toto, usaha ras perjuangan i bas kesempatan si lit denga guna idalani.

Bagenda me kecibal bangsa Israel, ringan ras nggeluh i bas pembuangan tentuna labo sitik pe maba kemalemn ate. I bas renungenta enda ituriken Dibata kai si jadi, bangsa enda ibuang erkiteken dosa-dosana man Dibata e maka ibuang, itundalken Dibata ia. Amin merawa pe Dibata tapi erkiteken IA dem perkuah ate, melias dengen erkeleng ate labo ia tetap i bas ukumenna. E maka IA jine erberita maka genduari tuhu-tuhu enggo mekuah ate Dibata ngenehen bangsaNa kesusuren Jakub. E maka Dibata jine si erpadan maka erbahan senang iakapna mulihi. Kesenangen ras kebanggan bangsa e tentuna ringan itaneh perpadanen. Ku je me mulihi ia ibaba Dibata. I je teneng iakapna nggeluh, la lit sierbahanca ia mbiar, ilupakenna kerina kinisuinna. Enda kerina ialokenna sanga ia erkemalangen man Dibata. Kerina enda pe jadi paksa Dibata ncidahkan kemuliaNa man bangsa-bangsa, janah ieteh bangsa e maka Dibatana la pernah mobah.

Iukum-ialemi, ipekpek-itambari, ibuang-ibaba mulihken, enda me si ibahan Dibata nandangi bangsa si nimbak ras erdosa. Banci saja i bas kegeluhenta sigejab lit paksa-paksa si bage sibentasi kita. Teklah Dibata la pernah lupa nandangi geluhta, suinta, keleng kal ateNa kita. Ula lupaken e. Nggeluhlah bagi singena ate Dibata. Ia desken bapa si rukur ras rusaha ngelakoken simehuli nandangi anak-anakna. Mari sinanami perkuah ateNa, nggeluhlah keleng ateNa si la pernah keru.